

Budimpešta: Inzko se susreo sa mađarskim ministrom vanjskih poslova



Visoki predstavnik i posebni predstavnik EU Valentin Inzko se danas susreo sa ministrom vanjskih poslova Mađarske Péterom Balázsom i obavijestio ga o trenutnoj političkoj situaciji u Bosni i Hercegovini sa osvrtom na naredne korake koje BiH treba učiniti u procesu euro-atlantske integracije.

“Bosna i Hercegovina ima europsku budućnost. Nadam se da će političari u ovoj zemlji smoci političke volje da poduzmu korake koji su potrebni BiH da bi postigla daljnji napredak prema EU. Sada smo na pravom putu u procesu liberaliziranja viznog režima, ali posao još nije završen. Bosanskohercegovački političari moraju nastaviti ove aktivnosti da bi ispunili uvjete EU koji vode ka bezviznom režimu naredne godine”, rekao je Inzko.

Govoreći danas na međunarodnoj konferenciji u Budimpešti Inzko je rekao da se riječ “prosperitet” rijetko kad pojavljuje u političkim razgovorima u Bosni i Hercegovini. Rekao je da razlog za ovo je što se “energija, fokus i resursi koje treba posvetiti donošenju prosperiteta troše na druge stvari.”

Visoki predstavnik i posebni predstavnik EU je istaknuo da “potišteni bosanskohercegovački građani nipošto ne mogu čekati prosperitet. To je nešto čime se možemo i moramo pozabaviti istodobno dok se bavimo političkim pitanjima,” te dodao da BiH

“može učiti na iskustvu zemalja koje su već prošle kroz tranziciju ka tržišnoj demokraciji i članstvu u EU”.

Visoki predstavnik i posebni predstavnik EU Inzko je rekao da su umorni građani BiH još uvijek lišeni prosperiteta u kome uživaju zemlje u Europskoj uniji. “Suočeni sa takvom situacijom”, rekao je Inzko, “ne možemo dozvoliti da se dalje odgađa hitni posao na ekonomskim i socijalnim reformama.”

Tražeći ponovno fokusiranje “na mehanizme kojima se postižu ne tek skromna poboljšanja, nego veliki iskoraci ka održivom prosperitetu”, visoki predstavnik i posebni predstavnik EU je utvrdio šest strateških ekonomskih oblasti – hidroenergetski potencijali, turizam, šumarstvo, poljoprivreda, informacijski autoput i cestovna infrastruktura – koji bi, kao što je rekao, mogli postati “temelji stvarnog prosperiteta.”

Visoki predstavnik i posebni predstavnik EU je govorio na konferenciji pod imenom “Put BiH ka stabilizaciji, prosperitetu i europskoj integraciji”, u organizaciji Mađarskog instituta za međunarodne odnose.